

新撥補役吏典不許已滿吏以貼買吏舍及  
買桌椅等項名色送回違者許被害之人指  
實陳告送問例

成化九年九月

日吏部爲陳言禁革奸

弊事吏糾抄出吏部聽撥當該吏景義

奏伏覩

詔書內一款凡軍民利病許諸人直言無隱欽此欽遵外  
切見在外西考役滿吏典給由赴部暫撥各  
衙門辦事三年之餘盤費用尽及至取到吏  
部又候數月方得實撥奈何有等役滿吏典  
用銀三四兩辦酒面會收接買桌椅價銀四  
五十兩者或二三十兩者其新撥吏典多因  
難難無從措典却被串同朋輩於本管官司

朦朧稟覆不與收叅或作寫字粗拙或作寫字遲慢送回吏部一時不知情弊照例捺降亦有畏懼送回捺降者不得已於債上之家揭借銀兩付與方許看役每銀十兩反覆加利遂至三四十兩者未免怨肆貪心瞞官作弊百計取索財物以償前債萬一敗露罪犯刑憲皆由頂買替頭卓椅之所致也切思在外衙門吏典頂頭累陳言革罷今在京五府六部衙門不行遵守尚有此弊如蒙乞

勅吏部通行禁革今後各衙門吏典交充名缺除順天府并大興宛平二縣吏舍查例另為處置其餘衙門只今自備卓椅不許仍前勒指財物等因具本成化九年九月內該通政司

奉天門奏奉

聖旨吏部知道欽此欽遵抄出到部送司案呈查得先節該給事中王讓等奏稱當該役滿名缺補後吏典名目替頭錢定要出備銀四五十兩或三二十兩中間多有自己無錢揭借軍民財物出納要行禁革等因本部已經題

准通行外衙門禁革去後今該前因合就速送該司仰用手本申明前例施行五府六部轉行各屬衙門一體禁約今後但有新撥補役吏典與交代之時不許旧役已滿吏以貼買吏舍為由及買卓椅等項名色送回累及人难敢有故違事例仍前指要頂頭等項財物者許被害之人指實陳告各該衙門徑自送問施行